

JARRAIBIDE TEKNIKOA - 01

IAKARRAIBIDE TEKNIKOAN - 01

(JT-01): KANPO-KONTROLAK

(JT-01): KANPO-KONTROLAK



aireaAIRE

2012

EUSKO JAURLARITZA



GOBIERNO VASCO

INGURUMEN, LURRALDE
PLANGINTZA, NEKAZARITZA
ETA ARRANTZA SAILA

DEPARTAMENTO DE MEDIO AMBIENTE,
PLANIFICACIÓN TERRITORIAL,
AGRICULTURA Y PESCA



ingurumena.net

Dokumentua:

JARRAIBIDE TEKNIKOA - 01 (JT-01): KANPO-KONTROLAK

Iturria:

Agindua, 2012 uztailearen 11koa, Ingurumen, Lurralde Plangintza, Nekazaritza eta Arrantzako sailburuarena. Honen bidez, jarraibide teknikoak ematen dira Atmosfera kutsa dezaketen jardueretarako instalazioak arautzen dituen abenduaren 27ko 278/2011 Dekretua garatzeko

Edizio-data:

2012

Jabea:

Eusko Jaurlaritza. Ingurumen, Lurralde Plangintza, Nekazaritza eta Arrantza Saila

EDUKIA

1.- HELBURUA.....	2
2.- ABENDUAREN 27KO 278/2011 DEKRETUKO LEHENENGO XEDAPEN IRAGANKORRAREN ERAGIN-EREMUAN DAUDEN INSTALAZIOAK.....	2
3.- KANPO-KONTROLAK.....	3
3.1.- BAIMENA BEHAR DUTEN INSTALAZIOAK.	3
3.1.1.- HASIERAKO KANPO-KONTROLA.	3
3.1.2.- AKDJ BAIMENAREN EGIAZTATZEA.....	3
3.1.3.- EMISIOEN KONTROLAK (NEURKETAK).....	4
3.1.4.- ADOSTASUN-ADIERAZPENA.	5
3.2.- JAKINARAZTEKO BETEBEHARRA DAUKATEN INSTALAZIOAK.....	5
3.2.1.- HASIERAKO KANPO-KONTROLA.	5
3.2.2.- JAKINARAZPEN-MEMORIA EGIAZTATZEA.....	5
3.2.3.- EMISIOEN KONTROLAK (NEURKETAK).....	6
3.2.4.- ADOSTASUN-ADIERAZPENA.	6
3.3.- AKDJ INSTALAZIOETAN ALDIZKAKO KANPO-KONTROLAK EGITEA.	7
3.4.- KONTROL OSAGARRIAK.....	7

1.- HELBURUA.

Instrukzio tekniko honen xedea da atmosfera kutsa dezaketen jarduerak (aurrerantzean, AKDJ) egiten dituzten instalazioen arauzko kanpo-kontrolen baldintzak ezartzea.

Atmosfera kutsa dezaketen jarduerak arautzen duen abenduaren 27ko 278/2011 Dekretuaren 3. artikulua definitutako kanpo-kontrolak honako hauek eskatzen ditu: AKDJ instalazioaren baimenaren baldintzak eta betebeharrak egiaztatzea (baimena behar duten instalazioen kasuan); edo, jakinarazpenen memoriak egiaztatzea (jakinarazpena behar duten instalazioen kasuan); kutsatzaileen emisioak zehaztea; eta, adostasun-adierazpena.

Ingurumen Kontrolerako Erakundeek (IKE) egin behar dituzten kanpo-kontrolak.

Kanpo-kontrolaren emaitzak IKE txostena deritzon agirian jaso behar dira. Emisioen kanpo-kontrola eta hari dagokion IKE txostena baliozkotzat jotzeko, batetik, akreditazio-erakunde aitortu batek ebaluatutako prozedurak bete behar dira; eta, bestetik, kutsadura atmosferikoari buruzko legediaren baldintza guztiak bete, instrukzio tekniko hauek eta berauek garatzeko argitaratzen diren agiri guztiak barne.

2.- ABENDUAREN 27KO 278/2011 DEKRETUKO LEHENENGO XEDAPEN IRAGANKORRAREN ERAGIN-EREMUAN DAUDEN INSTALAZIOAK.

Abenduaren 27ko 278/2011 Dekretuaren lehenengo xedapen iragankorraren eragin-eremuan dauden instalazioetako titularrek, behin urtarrilaren 28ko 100/2011 Dekretuan xedatutakora egokitu direnean, eta, betiere, xedapen horretan ezarritako epeen barruan, AKDJ baimena eskatu edo dagokion jakinarazpena bidali beharko dute, abenduaren 27ko 278/2011 Dekretuan xedatutako prozedurarekin bat. Kasu horietan, aldeztu aurretiko IKE txostenak —emisioen aldi behingo kontrolei buruzko txostenak— baliozkoak izango dira 3.1.3 eta 3.2.3 paragrafoen ondorioetarako; betiere, baimenean edo aplikatu beharreko legediaren kontrol horietarako ezarritako aldizkakotasunaren barruan egindako neurketen gainekoak badira, eta ezarritako muga gainditu ez bada.

Edonola ere, instalazio batek nahi badu txosten horiek kontuan har daitezkeen, IKEari esan beharko dio txosten horiek egon badaudela, eta haren esku utzi beharko ditu. IKEak, bada, txostenak kontsultatu eta baliozkoak ote diren aztertuko du, irizpide hauek aintzat hartuta:

1. «Indarrean» dagoen aldeztu aurretiko IKE txostenak aintzat hartzen ez baditu AKDJ baimen berriko kutsatzaile edo foku guztien emisio-kontrolak, neurtu beharko dira falta diren kutsatzaile eta fokuen emisioak.
2. Kutsatzaileak AKDJ baimenean ezarritakoez bestelako metodoen bidez neurtuta ere, IKE txostenen emaitzak, oro har, baliozkoak izango dira; betiere, kutsatzaile bera neurtu bada.

Instalazioek ingurumenaren alorreko eskumenak dituen sailera bidali beharko dituzte egin beharreko emisio-kontrol guztien txostenak, AKDJ baimeneko atmosfera-zaintzako programak edo jakinarazpen-txosteneko atmosfera-zaintzako planak osatzeko; bai eta emisioen gehieneko balioak (aurrerantzean, EGB) bete direla egiaztatzen duten kalkuluak azaltzeko behar den informazio osagarri guztia ere.

3.- KANPO-KONTROLAK.

3.1.- BAIMENA BEHAR DUTEN INSTALAZIOAK.

3.1.1.- HASIERAKO KANPO-KONTROLA.

AKDJ baimena behar duten instalazioen kasuan, honako alderdi hauek izango ditu IKEen hasierako kanpo-kontrolak:

- a) Azterketak: atmosferako kutsaduraren gaineko prebentzio-, zuzenketa-, jarraipen- eta kontrol-sistemek behar bezala funtzionatzen ote duten, eta AKDJ baimenean ezarritako baldintzak betetzen ote diren aztertzean datza.
- b) Emisioen kontrola: AKDJ baimenean ezarritako emisioen gehieneko balioak betetzen ote diren aztertzean datza. Horretarako, emititzen diren kutsatzaileen laginak hartu edo neurtuko dira.
- c) AKDJ baimena betetzearen adostasun-adierazpena: IKEaren kanpo-kontrolako txostenaren amaieran, adostasun-adierazpena edo adierazpenak ondorioztatu beharko dira. Alderdiren bat betetzen ez bada, txostenean zehaztu beharko da AKDJ baimenean ezarritako zein betekizun, baldintza, kontrol edo EGB ez den bete.

3.1.2.- AKDJ BAIMENAREN EGIAZTATZEA.

Baimenak egiaztatzeko, batetik, dokumentazioa egiaztatu behar da, eta, bestetik, instalazioa bertatik bertara.

3.1.2.1.- DOKUMENTAZIO EGIAZTATZEA.

Oro har, IKEak egiaztatuko du ea instalazioak ba ote dituen AKDJ baimenean adierazitako dokumentazioa eta erregistroak, eta ea AKDJ baimenean adierazitako baldintzak betetzen dituen edo ez.

Beste IKE batzuek aldeztu aurretik emandako arauzko txostenik indarrean badago, eta, 2. paragrafoan adierazitako irizpideen arabera baliozkoa bada, txosten horien berri eman behar da IKE txostenean.

IKEak ikusten badu dokumentazioari lotutako alderdiren bat betetzen ez dela, instalazioari jakinaraziko dio. Hala, baimenean ezarritako betekizunak eta baldintzak betetzeko neurriak hartu ahal izango ditu instalazioak; betiere, urtarrilaren 27ko 278/2011 Dekretuaren 11. artikuluan xedatutako epeak kontuan harturik. Ahalik eta azkarren jakinarazi beharko ditu dokumentazioen ez betetze horiek, instalazioak astia izan dezan dokumentu horiek IKEari aurkezteko, horrek hasierako txostena egin aurretik.

IKEaren hasierako txostenean, egiaztatutako dokumentu guztiak eta egindako egiaztapenen zerrenda azalduko da, behar bezala zehaztuta.

3.1.2.2.- INSTALAZIOAN BERTAN EGIN BEHARREKO EGIAZTATZEA.

Baimenetako baldintzak instalazioan bertan egiaztatu beharko dira. Halaber, IKE txostenean adieraziko da instalazioak AKDJ baimenean ezarritako neurri guztiak betetzen dituen ala ez. Honako alderdi hauek, gutxienez, egiaztatuko dira:

- ➔ AKDJ baimenari buruzko 100/2011 Errege Dekretuaren katalogoan jaso diren jarduerak, eta ez beste batzuk, aurrera eramaten ote dituen instalazioak. Hala dagokionean, zer beste jarduera egiten diren adieraziko da.
- ➔ Foku-kopurua: instalazioko AKDJ jardueri dagozkien fokuk baimenean adierazitako berberak ote diren egiaztatuko da. Hala dagokionean, foku gehiagorik ba ote dagoen adieraziko da, eta baita instalazioak horren inguruan emandako azalpena ere.
- ➔ Instalazioak bypassen irekierak kontrolatzeko sistemarik ba ote duen aztertzea, AKDJ baimenean ezarritakoari jarraiki.
- ➔ Instalazioak AKDJ baimenean adierazitako arazketa-sistemarik ba ote duen aztertzea. Halakorik ez badu, desbideratzeak eta haien garrantzia adieraziko dira.
- ➔ AKDJ baimenean ezarritakoarekin bat, emisioak etengabe neurtzeko sistemek (EENS) behar bezala funtzionatzen ote duten aztertzea, hala neurketa-sistema automatikoari (NSA) nola datuak eskuratu, tratatu eta komunikatzeko sistemari (ETKS) dagokionez. EAEko Airearen Kalitatea Kontrolatzeko eta Zaintzeko Sareari lotuta egon beharrik ez duten instalazioen kasuan, datu-tratamendurik egiten ote duten eta datu horiek erregistratzen ote dituzten aztertzea, eta ikustea nola dagoen xedatuta alderdi hori aplikatu beharreko instrukzio teknikoetan.
- ➔ Emisio barreiatuak gutxitzea. Konfinamendu, itxitura edo karenatzerik ba ote dagoen, metaketak ureztatzen ote diren eta bideak garbitzen ote diren aztertzea, bai eta mota horretako beste neurririk ezarri ote den ikustea ere, AKDJ baimenak dioena betetze aldera. Nahikoa izan daiteke neurri horiek betetzeko ekiporik, programarik eta abar ba ote dagoen aztertzea. Zer gune eta zer alderdi egiaztatu den ere zehaztu beharko da.
- ➔ Immisioak neurtzea. AKDJ baimenean halakorik ezarrita egonez gero, immisio-kabinarik ba ote dagoen eta behar bezala funtzionatzen ote duen aztertzea. Alegia, kabinarik ba ote dagoen eta egoki funtzionatzen ote duten adierazi beharko da.

IKEaren hasierako txostenean egindako azterketak eta emaitzak zerrendatu beharko dira.

Instalazioan bertatik bertara egiaztatu beharreko baldintzaren bat betetzen ez bada, IKEak horren berri eman beharko dio instalazioari; betiere, emisioen kontrolak egin aurretik. Jakinarazpen horren helburua da, hain zuzen, instalazioari aukera ematea betetzen ez dituen alderdiak zuzentzeko neurriak har ditzan. Abenduaren 27ko 278/2011 Dekretuaren 19. eta 20. artikuluetan deskribatutako aldaketen kasuan, dekretuaren 21. artikuluan ezarritakoa aplikatuko da.

3.1.3.- EMISIOEN KONTROLAK (NEURKETAK).

AKDJ baimenaren edukiaren egiaztatuta, IKEak kutsatzaileen emisioen gaineko kontrolak egingo ditu. Kontrol horiek aurrera eramateko, AKDJ baimenean ezarritako baldintzak eta jarraibide teknikoa -02 (JT-02) dokumentuan jasotako betekizun guztiak bete beharko ditu.

3.1.4.- ADOSTASUN-ADIERAZPENA.

IKEaren hasierako txostenean, hasierako kanpo-kontrollean egindako azterketak eta kontrolak jaso beharko dira. Halaber, txostenaren amaieran, adostasun-adierazpena edo adierazpenak ondorioztatu beharko dira, hau da, adierazi beharko da AKDJ baimenaren baldintzak betetzen diren ala ez. Baimeneko alderdiren bat betetzen ez bada, zehaztu beharko da zein betekizun, baldintza, kontrol edo EGB ez den bete.

Abenduaren 27ko 278/2011 Dekretuaren lehenengo xedapen iragankorraren eragin-eremuan dauden instalazioen kasuan, indarrean dauden aldeztutako aurretiko IKE txostenak aurkezten badituzte, txosten horietan zehaztutako emisioek AKDJ baimen berriko EGBak betetzen ote dituzten egiaztatuko du IKEak. Ildo horretan, EGBak betetzeari buruzko adostasun-adierazpen bakarra emango du IKEak, berak egindako kontrolak zein indarrean dauden aldeztutako aurretiko IKE txostenetako emaitzak aintzat hartuta.

3.2.- JAKINARAZTEKO BETEBEHARRA DAUKATEN INSTALAZIOAK.

3.2.1.- HASIERAKO KANPO-KONTROLA.

Jakinarazpena beharrezkoa duten instalazioen kasuan, abenduaren 27ko 278/2011 Dekretuaren 16. artikuluan ezarritako prozeduraren arabera, honako agiri hauek aurkeztu beharko dituzte ingurumenaren alorreko eskumenak dituen sailean: batetik, memoria teknikoak, II. eranskineko ereduari jasotzen den edukia biltzen duena (eta, horri erantsita, erantzukizunpeko adierazpena); eta, bestetik, IKEaren hasierako txostena. Azken horrek jasoko ditu memoria teknikoaren egiaztapena, emisioen kontrolak eta adostasun-adierazpena.

Instalazioak jakinarazitako jarduerak ez badute foku konfinaturik, eta kutsatzaileen kontrolik egin behar ez bada, ez da beharrezkoa izango hasierako IKEaren txostena aurkeztea jakinarazpena egiteko. Bestalde, kasu horietan, instalazioak IKEaren azterketarik gabeko jakinarazpen-memoria bidali ahal izango du. Jakinarazpen-memoria horrekin batera, erantzukizun-adierazpena ere aurkeztu beharko du instalazioak.

3.2.2.- JAKINARAZPEN-MEMORIA EGIAZTATZEA.

Instalazioak argi eta garbi identifikatu beharko du jakinarazpen-memoria teknikoak. Hartara, honako datu hauek, gutxienez, adierazi beharko ditu: izenburua, bertsioa, jaulkitze-data eta memoria idazteaz arduratu den pertsona edo pertsonak. Hain zuzen, identifikazio hori erabiliko da memoriari erreferentzia egiteko IKEaren hasierako txostenean.

Jakinarazpen-memoria aztertzean, IKEak beharrezkotzat jotzen badu informazioaren bat zuzentzea edo gehitzea, instalazioari eskatuko dio beharrezkoak diren aldaketak egin ditzala memorian; betiere, urtarrilaren 27ko 278/2011 Dekretuan eta instrukzio tekniko honetan txostenetarako ezarritako baldintzak betetze aldera. Emisioen kontrolak egiten hasteko, nahitaezkoa da IKEak bere eskuetan memoria nahikoa eta osoa izatea. IKEak ontzat emandako memoria hori ezin izango da aldatu, eta horixe bera bidali beharko du instalazioak, jakinarazpenaren izapidea osatzeko.

Instalazioak informazio osagarria gehitu behar badu, IKEak memoria teknikoak egiaztatu eta hasierako IKE txostena idatzita, eranskin batean aurkez dezake informazio hori. Kasu horretan, bada, instalazioaren titularrak bermatuko du informazio osagarri horretan jasotako informazioa egiazkoa dela erantzukizun-adierazpen baten bidez. Bide hori ezin izango da erabili, baldin eta informazio gehigarri horrek

aldaketaren bat eragiten badu instalazioaren administrazio-erregimenean, edo funtsezko aldaketaren bat eragiten badu, edo/eta abenduaren 27ko 278/2011 Dekretuaren 21. artikulua (2.b) idatzi-zatian aipatutako aldaketetako bat eragiten badu. Izan ere, kasu horietan, dekretuaren arabera jokatu beharko da.

IKEak memoriaren honako arlo hauek egiaztatu eta hasierako txostenean adierazi behar ditu:

1. Jakinarazpen-memoria abenduaren 27ko 278/2011 Dekretuaren II. eranskinean adierazitako edukiarekin bat ote datorren: IKEak egiaztatuko du memoriak eranskin horretan adierazitako atal guztiei buruzko datuak jasotzen ote dituen, edo, aitzitik, datuen bat falta ote den, eta, hala izanez gero, zergatik falta den. Halaber, egiaztatuko du atal horietako informazioa nahikoa ote den bai fokuen eta instalazioaren katalogazioa, bai kontrolatu beharreko kutsatzaileak justifikatzeko.
2. Urtarrilaren 28ko 100/2011 Errege Dekretuaren arabera jardueren eta fokuen katalogazioa zuzena ote den: prozesuen eta haien ezaugarrien deskribapena aintzat hartuta, IKEak berriro egiaztatuko du ea jardueren eta fokuen katalogazioa zuzena ote den; betiere, urtarrilaren 28ko 100/2011 Errege Dekretuan xedatutakoaren arabera. Halaber, egiaztatuko du instalazioan A edo B motako jarduerak edo mota bereko zenbait jarduera egiten ote dituzten, instalazio hori abenduaren 27ko 278/2011 Dekretuaren 10. artikulua eragin-esparruan ba ote dagoen ikusteko. Kasu horretan, bada, IKEak egoera horren berri eman beharko dio lehenbailehen instalazioari, instalazioak ahalik eta lasterren egin dezan AKDJ baimen-eskaera.
3. Atmosferaren zaintza planaren proposamena araudiari egokitzen ote zaion:

IKEak egiaztatuko du emisioak kontrolatzeko proposameneko kutsatzaileak bat ote datozen aplikatu beharreko araudian ezarritakoekin. Zalantzarik edo instalazioaren titularrarekin desadostasunik egonez gero, IKEak kontsulta egingo dio ingurumenaren alorreko eskumenak dituen sailari, horretarako, behar adina datu tekniko emango dizkio.

IKEak egiaztatuko du bost urtean behin, gutxienez, emisio-kontrolik proposatzen ote den C talde gisa katalogatutako jardueri lotutako fokuzientzat.

4. Bestelako egiaztapenak: aire-kutsadurari lotutako neurri zuzentzaileei erreferentzia egiten badie jakinarazpen-memoria teknikoak (jarduera-lizentzia lortzeko izapidetze-prozesuan zehar ezarritako neurriez ari gara), IKEak instalazioan bertan egiaztatu beharko du neurri zuzentzaile horiek jada instalatuta ote dauden, antzeko sistemarik instalatu ote den, edo egiteke ote dauden.

3.2.3.- EMISIOEN KONTROLAK (NEURKETAK).

Jakinarazpen-memoria teknikoak egiaztatu ondoren, indarrean dagoen araudian ezarritako kutsatzaileen emisioak kontrolatu beharko ditu IKEak. Emisioen arauzko kontrolek JT-02 agirian ezarritako baldintzak bete beharko dituzte.

Ez dira emisioen kontrolak egingo, baldin eta jakinarazpen-memoriak ez baditu betetzen aurreko 3.2.2. ataleko baldintzak.

3.2.4.- ADOSTASUN-ADIERAZPENA.

Hasierako IKE txostenak, jakinarazpena beharrezkoa duten instalazioen kasuan, honako alderdi hauek izan beharko ditu: txostenaren gaineko erreferentzia argia, JT-02 agirian ezarritakoaren arabera

egindako neurketen emaitzak, eta instalazioari aplikatu beharreko kutsatzaileen EGBak betetzen dituela egiaztatzeko adostasun-adierazpena.

3.3.- AKDJ INSTALAZIOETAN ALDIZKAKO KANPO-KONTROLAK EGITEA.

Aldian behingo kanpo-kontrolak abenduaren 27ko 278/2011 Dekretuaren 3. artikuluan jasotako definizioarekin bat egingo dira. AKDJ baimena beharrezkoa duten instalazioen kasuan, baimenean bertan ezarritakoa hartuko da erreferentzia gisa. Jakinarazpena behar dutenen kasuan, ordea, jakinarazpen-txosteneko atmosfera zaintzeko planaren proposamenean ezarritakoa hartuko da erreferentzia; hala ere, jakinarazpena egin ondorengo ebazpenen bat baldin badago, ebazpen horretan xedatutakoa jarraituko da.

Hortaz, instalazioak IKEaren esku jarri beharko ditu AKDJ baimena, txostena eta, hala dagokionean, indarrean dagoen ebazpena.

Emisioen kontrolak JT-02 agirian ezarritako baldintzei jarraituta eraman beharko dira aurrera.

IKE txostenak jaso beharko du indarrean dagoen legediaren edo aplikatu beharreko baimenen gaineko adostasun-adierazpena.

IKEek aldi behingo kanpo-kontrolari buruzko IKE txostenak idatzi eta ingurumenaren alorreko eskumenak dituen sailera bidali behar dituzte, laginak hartu eta neurketak egin ondorengo hiru hilabeteetan. Ingurumenaren alorreko eskumenak dituen sailak, ebazpen bidez, epe hori luzatzeko erabakia hartuko du soilik aurretik espresuki eskatu bada, eta luzapena eskatzeko arrazoiak azaldu badira.

3.4.- KONTROL OSAGARRIAK.

Ingurumenaren alorreko eskumenak dituen sailak eskatu ahal izango die bestelako kanpo-kontrolak egiteko instalazioen titularrei; betiere instalazio horiek AKDJ baimenaren edo indarrean dagoen araudiaren baldintzen ez betetze baten oinarritutako susmoa badago.

Kasu horietan, bada, instrukzio tekniko honetan azterketei buruzko irizpide orokorrei jarraituko zaie: ingurumenaren alorreko eskumenak dituen sailak agiri bat eman badu instalazioak bete beharreko betekizun, kontrol eta baldintzei buruz, IKEak egiaztatuko du ea instalazioaren ezaugarriak bat ote datozen ingurumenaren alorreko eskumenak dituen sailak egindako agirian ezarritakoarekin.